

Bil. 3

Khamis

3 Mac 2022



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGKAL KELIMA
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Jawatankuasa bagi Mengenal Pasti Sekolah Daif di Sabah**
- *YB. Tuan Tuan Chan Foong Hin (Kota Kinabalu)* (Halaman 1)
- **Bantuan EPOKU Yang Telah Diubah Kepada Sistem Tanpa Tunai 'JKMPay'**
- *YB. Tuan Kesavan a/l Subramaniam (Sungai Siput)* (Halaman 2)

**MALAYSIA
KAMAR KHAS
PARLIMEN KEEMPAT BELAS
PENGKAL KELIMA
MESYUARAT PERTAMA
Khamis, 3 Mac 2022**

Mesyuarat dimulakan pada pukul 2.30 petang

DOA

*[Dato' Ramli bin Dato' Mohd Nor (Cameron Highlands)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Jawatankuasa bagi Mengenal Pasti Sekolah Daif
di Sabah**

2.34 ptg.

Tuan Chan Foong Hin [Kota Kinabalu]: Tuan Yang di-Pertua, pertama sekali, terima kasih diucapkan atas peluang yang diberikan kepada saya untuk bercakap dalam Kamar Khas ini. Saya ingin merujuk kepada laporan dalam media di mana Menteri Tugas-tugas Khas merangkap Exco Pendidikan Negeri Sabah, Datuk Mohd. Arifin Mohd. Arif dilaporkan berkata, satu Jawatankuasa Pembangunan Pendidikan Negeri Sabah akan mengenal pasti sekolah-sekolah daif yang perlu pembinaan baharu atau penaiktarafan segera dan akan mengadakan mesyuarat pada bulan Januari 2022 untuk memberikan input kepada Kementerian Pendidikan.

Datuk Mohd. Arifin menyatakan bahawa Jawatankuasa Pembangunan Pendidikan ini dipengerusikan oleh beliau sendiri dan turut dianggotai oleh 15 orang ahli termasuk Pengarah Pendidikan Negeri. Beliau berkata langkah sebegitu akan memudahkan Kementerian Pendidikan untuk mendapatkan senarai sekolah-sekolah yang perlu penaiktarafan dan pembinaan baharu di Sabah.

Dilaporkan setakat 31 Mei 2020, sebanyak 414 buah sekolah di Sabah mempunyai bangunan pada skala impak 6 iaitu tidak selamat dengan pengesahan Jabatan Pendidikan Negeri. Sementara itu, 52 buah sekolah mempunyai bangunan pada tahap skala impak 7 iaitu tidak selamat dengan pengesahan Jabatan Kerja Raya (JKR).

Di sini, saya ingin bertanya kepada Menteri, adakah Kementerian Pendidikan sudah menerima input ataupun senarai sekolah daif atau tidak selamat daripada Jawatankuasa Pembangunan Pendidikan yang dipengerusikan oleh Datuk Mohd. Arifin ini? Berapakah jumlah sekolah yang dikenal pasti? Bilakah peruntukkan boleh diluluskan dan bilakah pembaikan dapat bermula? Sila Menteri jawab. Sekian, terima kasih.

2.36 ptg.

Timbalan Menteri Pendidikan I [Dato' Dr. Mah Hang Soon]: Terima kasih kepada Yang Berhormat Kota Kinabalu. Tuan Yang di-Pertua, Kementerian Pendidikan Malaysia (KPM) sentiasa memberi perhatian kepada usaha menyediakan prasarana dan kemudahan infrastruktur pendidikan yang selamat dan kondusif untuk kegunaan murid dan warga sekolah di seluruh negara.

Untuk makluman Ahli Yang Berhormat, Jabatan Pendidikan Negeri (JPN) Sabah telah menghadiri satu pertemuan bagi membincangkan pembentukan Jawatankuasa Pembangunan Pendidikan Negeri Sabah dan dipengerusikan sendiri oleh Menteri Tugas-Tugas Khas merangkap Exco Pendidikan Negeri Sabah pada 21 Disember 2021.

Fungsi Jawatankuasa Pembangunan Pendidikan Negeri Sabah adalah bagi membincangkan isu pembangunan pendidikan termasuklah berkaitan sekolah yang mempunyai bangunan daif di negeri Sabah dan telah dibentangkan dalam pertemuan ini. KPM melalui JPN Sabah bersedia untuk membekalkan maklumat mengenai data semasa berkaitan sekolah yang mempunyai bangunan daif di negeri Sabah dalam Mesyuarat Jawatankuasa Pembangunan Pendidikan Negeri Sabah.

Berdasarkan rekod KPM, sehingga Februari 2022, terdapat 419 buah sekolah yang mempunyai bangunan daif di negeri Sabah. Daripada jumlah tersebut, terdapat sebanyak 384 buah sekolah berskala 6 dan sebanyak 35 buah sekolah berskala 7. Keutamaan KPM adalah kepada bangunan yang berada pada skala 6 dan skala 7 untuk dibaik pulih atau dibina bangunan gantian mengikut keperluan.

Untuk makluman Ahli Yang Berhormat, dalam Rancangan Malaysia Ke-12 (RMKe-12) *Rolling Plan 1* (RP1) tahun 2021 dan RP2 tahun 2022, sejumlah 44 projek baik pulih atau pembinaan gantian sekolah yang mempunyai bangunan daif telah diluluskan di negeri Sabah. Buat masa ini, status pembinaan projek ini masih berada di fasa prabina. Berdasarkan data KPM, sehingga 28 Februari 2022, sebanyak 169 buah sekolah yang mempunyai bangunan daif telah siap dibina gantian penuh di negeri Sabah.

KPM akan mengemukakan permohonan mengenai cadangan baik pulih atau pembinaan gantian sekolah yang mempunyai bangunan daif secara berperingkat kepada Agensi Pusat bagi setiap RP dalam Rancangan Malaysia Lima Tahun (RMLT), tertakluk kepada pertimbangan dan kelulusan agensi pusat serta kedudukan semasa kewangan kerajaan. Sekian, terima kasih.

**Bantuan EPOKU Yang Telah Diubah Kepada
Sistem Tanpa Tunai 'JKMPay'**

2.39 ptg.

Tuan Kesavan a/l Subramaniam [Sungai Siput]: Terima kasih, Tuan Yang di-Pertua, Yang Berhormat Menteri Kementerian Wanita Keluarga dan Masyarakat. Bantuan ataupun elaun EPOKU yang diberikan oleh Jabatan Kebajikan Masyarakat (JKM) kepada golongan OKU yang sebelum ini secara tunai telah diubah kepada sistem baharu iaitu sistem tanpa tunai yang dikenali sebagai 'JKMPay'.

■1440

Projek ini sudah mula dilaksanakan sebagai rintis dengan kerjasama strategik bersama Bank Islam Malaysia sejak 1 Februari 2021 yang lalu sehingga kini. Projek ini walaupun di peringkat rintis telah mencetuskan pelbagai reaksi negatif dan ketidakselesaian dalam kalangan golongan OKU di negara ini. Perkara itu menurut Timbalan Presiden dengan izin, Malaysian Independence Living Association for Disabled (MILAD), Noor Muha Aziz akan menyukarkan penerima elaun tersebut daripada pelbagai sudut termasuk daripada segi pergerakan, menafikan hak berbelanja dan tidak mesra OKU.

Ini kerana, melalui JKMPay, penerima bantuan akan menerima hanya 50 peratus daripada kadar bantuan yang diluluskan dan dikreditkan ke dalam akaun Bank Islam penerima dan ia boleh dikeluarkan dengan kad debit ATM Bank Islam. Sementara, 50 peratus lagi akan dimasukkan ke dalam Kad Cashless JKMPay. Sebagai permulaan, penerima bantuan hanya boleh berbelanja untuk barang keperluan asas, keperluan harian dan ubat ubatan di 250 kedai berdaftar dengan Bank Islam sahaja.

Namun, pembelian yang tidak tersenarai dalam maklumat barang keperluan, tidak dibenarkan untuk menggunakan Kad Cashless JKMPay sama sekali. Maknanya, separuh daripada jumlah elaun tersebut hanya boleh digunakan di kedai panel JKM sahaja. Bagaimanakah dengan nasib OKU yang tinggal di luar bandar? Adakah JKM menyediakan kedai panel berdekatan mereka? Adakah kedai atau premis perniagaan yang dipilih JKM mesra OKU?

Begitu juga, ada dalam kalangan golongan OKU yang menggunakan wang elaun tersebut untuk menampung bayaran sewa rumah. Apakah nasib mereka jika separuh daripada elaun tersebut dijadikan *cashless*? Ternyata jika JKMPay diperkenalkan secara menyeluruh ia, tidak memberi apa-apa faedah kepada golongan OKU malah menyekat kebebasan mereka untuk berbelanja melalui wang bantuan yang diterima. Tuan Yang di-Pertua, saya mohon Menteri memberikan penjelasan atas perkara yang dibangkitkan oleh golongan OKU. Sekian, terima kasih.

2.42 ptg.

Menteri Pembangunan Wanita, Keluarga dan Masyarakat [Datuk Seri Rina binti Mohd Harun]: Terima kasih, Tuan Yang di-Pertua. Terima kasih juga kepada Yang Berhormat Sungai Siput atas soalan yang diberikan. Tuan Yang di-Pertua, Kementerian Pembangunan Wanita, Keluarga dan Masyarakat melalui Jabatan Kebajikan Masyarakat (JKM) sedang melaksanakan satu inisiatif baharu iaitu Projek Bayaran Bantuan Kewangan Tanpa Tunai, (*cashless*) atau dikenali sebagai JKMPay. Projek ini berstatus projek rintis dilaksanakan ke atas penerima bantuan kelulusan baharu sahaja dan tidak melibatkan penerima bantuan sedia ada.

Skim bantuan kewangan yang terlibat bukan hanya untuk kepada OKU, tetapi juga, kepada semua Skim Bantuan Bulanan Persekutuan iaitu Bantuan Kanak-Kanak, Bantuan Warga Emas, Elaun Pekerja Orang Kurang Upaya, Bantuan Penjagaan OKU Pesakit Kronik Terlantar, Bantuan OKU Tidak Berupaya dan Bantuan Anak Pelihara.

Tuan Yang di-Pertua, untuk makluman Ahli Yang Berhormat, projek ini dilaksanakan dengan tujuan berikut; Pertama, kita ingin membantu penerima

bantuan untuk mengurus dan mengawal perbelanjaan wang bantuan secara berhemat dan bermanfaat. Ini kerana, bantuan daripada JKM ini, hendaklah digunakan untuk keperluan harian mereka. Ini kerana ia bukan bantuan yang banyak, *amount* yang diberikan itu tidak banyak, sedikit. Jadi, sekurang-kurangnya keperluan asas mereka itu perlu dijaga.

Di samping itu, memperluaskan mekanisme kaedah pembayaran bantuan kewangan JKM melalui kaedah bayaran ke bank dan juga kaedah tanpa tunai. Ketiga, memastikan penerima bantuan dapat memenuhi keperluan asas harian, khususnya melibatkan keperluan makan, minum, ubat-ubatan asas dan keperluan harian rumah. Keempat, memperkukuhkan kolaborasi antara kerajaan dan pihak swasta dalam meningkatkan perkhidmatan agensi di bawah kementerian. Seterusnya, menyokong ke arah mewujudkan masyarakat digital selaras dengan rangka tindakan Rangka Tindakan (Blueprint) Ekonomi Digital Malaysia.

Kita tidak mahu apabila ia dilaksanakan nanti, maka, golongan rentan terutama penerima bantuan JKM ini tertinggal. Oleh sebab itu, projek rintis ini dimulakan dengan mengambil kira pelbagai cara untuk menambah baik program ini dari masa ke masa. Dalam masa yang sama, kita juga menggalakkan penglibatan penerima bantuan transaksi digital agar tidak ketinggalan dalam era digital.

Di samping itu, projek ini juga sejajar dengan hala tuju baharu bantuan sosial di bawah Majlis Perlindungan Sosial Malaysia (MySPC) memfokuskan agar semua bantuan pada masa hadapan hendaklah bersyarat dengan mempunyai dasar pemisah (*exit policy*), dengan izin, yang jelas dan kesegeraan dalam pengagihan pemprosesan bantuan.

JKMPay telah dilaksanakan secara rintis melalui bulan Februari 2021, setiap lokasi projek rintis dilaksanakan. Kementerian telah melakukan kunjungan hormat dan libat urus bersama kerajaan negeri bagi menjelaskan mengenai projek rintis ini. Peserta-peserta juga telah diberikan taklimat bagi penggunaan kad dan aplikasi agar mereka memahami konsep tanpa tunai dan bagi membimbing mereka dalam penggunaan JKMPay.

Kalau kita lihat sekarang ini pun sudah banyak kedai transaksi yang menggunakan *cashless*. Sehingga Februari 2022, sejumlah 4,752 peserta dari enam buah negeri dan 23 daerah telah pun terlibat.

- (i) Perlis, 693 peserta;
- (ii) Kedah, 2,661 peserta;
- (iii) Melaka, 924 peserta;
- (iv) Terengganu, 255 peserta;
- (v) Kelantan, 180 peserta; dan
- (vi) Selangor, 39 peserta.

Tuan Yang di-Pertua, untuk makluman Ahli Yang Berhormat, sebagaimana yang telah dinyatakan sebelum ini, projek rintis ini hanya dilaksanakan kepada penerima baharu bantuan bulanan JKM sahaja. Manakala 519,409 penerima bantuan bulanan sedia ada masih kekal menerima bantuan bulanan melalui bayaran ke akaun bank.

Penerima baharu juga kekal menerima kesemua jumlah keseluruhan bantuan yang diluluskan secara 100 peratus. Tiada potongan yang dibuat. Sebagai contoh seperti Yang Berhormat sebutkan tadi, penerima Elaun Pekerja

OKU (EPOKU) yang melepasi syarat kelayakan bekerja dengan pendapatan bawah RM1,500 sebulan yang sebelum ini bernilai RM1,200 dan telah dinaikkan kepada RM1,500 sebulan. Mereka akan layak menerima bantuan EPOKU sebanyak RM450 sebulan.

Sekiranya gaji penerima ini – katalah bukan berjumlah RM1,500 tetapi RM1,300. RM1,300 dan ditambah EPOKU berjumlah RM450 dengan yang dibayar 50 peratus melalui bank atau RM225 dan 50 peratus atau RM225 secara JKMPay maka, penerima masih mempunyai baki berjumlah RM1,525 secara tunai di bank. Ia masih boleh digunakan bagi tujuan kegunaan seperti bayaran sewa rumah, tambang pengangkutan, pembelian secara *online* dan lain-lain.

Jadi, yang kita hadkan ini adalah supaya penerima bantuan membeli barang-barang keperluan asas, keperluan harian, ubat-ubatan dan sebagainya. Jadi ini yang kita cadangkan supaya mereka ini membuat transaksi tanpa tunai di mana-mana kedai runcit, kedai farmasi dan kedai makan yang menyertai program ini tanpa tunai.

Semua barangan di dalam kedai berkenaan boleh dibeli seperti:

- (i) semua jenis keperluan bahan makan dan minuman seperti beras, gula, sayuran, minyak, ikan, ayam, sardin dan lain-lain;
- (ii) barang keperluan kegunaan harian seperti lampin bayi, *pampers* untuk orang dewasa, tuala wanita, bahan pencuci dan lain-lain; dan
- (iii) keperluan ubat-ubatan dan alatan berkaitan ubatan.

Dalam masa yang sama, kita juga sedang melaksanakan transaksi bagi pembayaran semua bil dan utiliti berkaitan di samping membuat pembelian tambah nilai (*top-up*) perkhidmatan telefon dan hanya transaksi bagi pembelian rokok dan minuman beralkohol adalah dilarang bagi mengelakkan pengambilan barang yang tidak sihat menggunakan JKMPay.

Malahan baki atau lebihan duit yang ada dalam akaun JKMPay juga tidak akan luput. Bukan kalau sebulan itu tidak guna, ia habis, maka bulan depan luput, tidak. Ia akan boleh digunakan malahan akan dibawa ke bulan berikutnya. Bagi peserta program yang mahir menggunakan aplikasi telefon di <https://jkmpay.my> ataupun Me12Pay, pelbagai menu aplikasi secara atas talian boleh digunakan seperti memantau perbelanjaan harian, membuat semakan baki, membayar bil dan utiliti, membeli *top-up* tanpa perlu keluar ke kedai dan melihat senarai kedai berdekatan yang boleh diakses pandu arah melalui *maps*.

Kementerian amat sedar mengenai keperluan asas penerima khususnya golongan OKU untuk menggunakan duit bantuan yang diperoleh setiap bulan. JKMPay tidak bertujuan untuk menyekat mana-mana hak kebebasan OKU untuk berbelanja.

■1450

Apa yang diwujudkan adalah mekanisme atau kaedah berbelanja ditambah atau diperluaskan lagi di mana selain daripada perbelanjaan tunai, penerima boleh melaksanakan perbelanjaan secara tanpa tunai.

Malahan melalui kaedah tanpa tunai ini, tiada caj tambahan atau fi transaksi dikenakan berbanding sebagaimana caj RM1 boleh dikenakan jika mengeluarkan duit melalui mesin ATM. Tuan Yang di-Pertua, sehingga Februari

2022, terdapat sejumlah 397 kedai aktif dalam projek ini manakala 250 kedai baharu telah memohon dan berminat untuk terlibat dalam projek ini.

Kementerian sedang berusaha memperbanyakkan kedai-kedai ini untuk memberi kemudahan kepada penerima bantuan. Malahan, penerima bantuan juga boleh mencadangkan kedai atau premis bersesuaian bagi mengikuti program ini. Jadi, kita juga ada *engagement* dengan penerima-penerima bantuan. Cadangan ini boleh disalurkan oleh peserta melalui empat kaedah:

- (i) Telegram grup peserta;
- (ii) Call-Centre 1-300-88-7977;
- (iii) aplikasi telefon, Me12Pay; dan
- (iv) melalui email, info@me12pay.com.

Tuan Yang di-Pertua, berdasarkan kepada kajian penilaian 6 bulan pertama. Kajian ini melibatkan 1,066 peserta pada Oktober 2021. Apabila kita buat kajian ini kita bukan buat *sampling*. Bukan daripada 1,066 kita cuma buat 100 orang sahaja, tidak. Setiap orang daripada mereka kita jalankan kajian untuk kita hendak menambah baik sistem ini. Dapatan kajian adalah seperti yang berikut;

- (i) 76 peratus setuju *cashless* memudahkan;
- (ii) 80 peratus menyatakan *cashless* lebih selamat berbanding perbelanjaan tunai. Ini kerana ada aduan yang diterima mereka yang membawa *cash* ini kadang-kadang warga emas, OKU yang duitnya dicuri dan sebagainya. Ada juga dalam kalangan ini sebagai contoh, apabila bantuan dinaikkan daripada RM350 kepada RM500 iaitu sejak tahun 2021, apabila kita tanya "*Mak cik tahu tidak bantuan ini sudah naik RM500?*", "*Eh, mak cik tidak tahu pun selama ini mak cik ingat RM300 sahaja*", "*Siapa yang pegang kad?*", "*Anak*". Oleh sebab itu kita hendak pastikan sekurang-kurangnya keperluan asas penerima bantuan JKM ini terjaga.
- (iii) 80 peratus menyatakan kawalan perbelanjaan mereka lebih baik melalui kaedah *cashless*; dan
- (iv) 73 peratus berpuas hati dengan transaksi dan jumlah kedai di kawasan.

Kementerian juga mendapati bahawa melalui projek JKMPay ini, telah digunakan oleh penerima bantuan dengan sebaiknya bagi memenuhi keperluan asas mereka. Jadi, daripada rekod itu kita boleh lihat duit bantuan yang diberikan ini dibelanjakan ke mana. Daripada situ kita lihat, sehingga – keperluan makan dan minum iaitu PADA 80.8 peratus atau RM3.37 juta. Manakala, 16.2 peratus membeli keperluan rumah seperti lampin bayi, tuala wanita, sabun pencuci dan lain-lain.

Sejumlah 2.3 peratus bagi keperluan lain seperti pembayaran bil dan utiliti, *top-up* dan sebagainya. Sebanyak 0.7 peratus dibelanjakan bagi tujuan pembelian ubat-ubatan. Ini menunjukkan bahawa program ini memberi impak yang baik dan manfaat kepada peserta dalam memenuhi keperluan asas mereka.

Projek ini bukan sahaja membantu penerima bantuan malahan ia dapat mewujudkan prasarana ekonomi yang baik dalam kalangan pekedai runcit dan

kedai-kedai kecil di seluruh negara. Antara manfaat yang diperoleh sebagai contoh – apabila kita sebutkan nama-nama kedai ini, ia bukan hanya *hypermarket*, bukan hanya kedai yang besar-besar, tetapi mereka boleh menamakan kedai-kedai yang ada di sekitar mereka.

Dalam masa yang sama, kita dapat meningkatkan kesedaran peruncit untuk menyediakan premis yang mesra OKU dan mesra warga emas. Ini kerana, dia tahu bila dia ada penerima dan pembeli itu daripada kalangan mereka itu dia akan secara tidak langsung memberikan kesedaran kepada kedai-kedai ini menyediakan *accessibility* yang baik kepada golongan ini. Dalam masa yang sama, ini adalah untuk meningkatkan usaha pendigitalan dalam kalangan peruncit. Ketiga, kaedah perbelanjaan tanpa tunai lebih selamat berbanding perbelanjaan secara tunai dan sesuai dengan situasi semasa.

Keempat, lokasi kedai yang berdekatan dengan penerima bantuan memberi pasaran baharu kepada peruncit kerana ia mengikut permohonan penerima bantuan dan seterusnya program ini fleksibel dan boleh diubah dari semasa ke semasa berdasarkan keperluan Jabatan dan penerima bantuan.

Usaha-usaha penambahbaikan juga telah dilaksanakan oleh kementerian melalui pendekatan berikut – Kita juga ada buat *engagement* dengan kerajaan negeri. Sebagai contoh di negeri Kedah, pada mula cadangnya dua daerah tetapi kerajaan negeri mohon supaya dapat diperluaskan. Ini *engagement* yang kita buat dengan kerajaan negeri. Ini juga sebenarnya program-program sebegini telah banyak dilaksanakan. Sebagai contoh, di Selangor, dia ada kad untuk ibu tunggal, di Kedah juga ada Kad Kasih Ibu Darul Aman (KIDA) yang guna *cashless*.

Ini bukan satu perkara yang baharu. Selain daripada itu, kita hendak mempelbagaikan platform pembayaran digital. Kita juga menyediakan senarai direktori pekedai di setiap daerah rintis dan dipaparkan di laman web, sosial media KPWKM dan JKM serta di aplikasi Me12Pay. Selain daripada itu kita menambah bilangan pekedai termasuk farmasi, klinik, kedai makan dan perkhidmatan penghantaran dari semasa ke semasa.

Dalam jangka masa panjang, kita juga bercadang – ini dalam perbincangan supaya penerima kad JKMPay ini boleh dijadikan sebagai kad diskaun. Katalah ada syarikat elektrik mengatakan jika penerima pemegang kad JKMPay ini dia akan bagi 20 *percent* diskaun. Jadi, ini antara salah satu di masa hadapan yang akan kita bincangkan dan *insya-Allah* akan dilaksanakan.

Memandangkan pendigitalan penyampaian perkhidmatan ini merupakan agenda masa depan negara, kementerian akan memastikan usaha penambahbaikan projek rintis ini sentiasa dilaksanakan agar dapat memberi manfaat dan memudahkan penerima bantuan. Oleh sebab itu, satu kajian menyeluruh akan diadakan bagi memastikan suatu hala tuju dan dasar berkaitan projek ini dapat ditentukan. Oleh sebab itu, ia ambil masa setahun, sebab bukan mudah walaupun projek rintis kita sudah dapat banyak. Jadi, sebab itu saya katakan tadi, selepas enam bulan kita buat satu kajian. Ini selepas setahun kita buat lagi kajian yang lebih menyeluruh.

Oleh sebab, kita tidak mahu apabila pendigitalan daripada segi sektor ekonomi pada masa akan datang dengan semua orang akan menggunakan digital maka golongan rentan JKM ini tertinggal. Itu kita tidak mahu. Jadi, sebab itu kita boleh buat persediaan dari sekarang dengan sikit demi sikit bagaimana menambah baik dalam program ini. Kita tambah lagi lebih banyak kedai supaya

ada *accessibility* kepada mereka. Ini bagi membantu mereka untuk menyediakan mereka untuk masa akan datang.

Dalam tempoh masa ini, projek ini akan kekal berstatus projek rintis di lokasi sedia ada dan belum diperluaskan ke negeri dan daerah lain sehingga laporan kajian dinyatakan dibentangkan. Kementerian sentiasa mengalu-alukan dan membuka peluang kepada semua pihak untuk memberikan pandangan dan juga cadangan dalam menambah baik program ini. Terima kasih.

Dato' Ramli bin Dato' Mohd Nor [Cameron Highlands]: Ahli-ahli Yang Berhormat semua Mesyuarat Kamar Khas kali ini ditangguhkan ke hari Isnin, 7 Mac 2022, jam 2.30 petang.

[Kamar Khas ditangguhkan pada pukul 2.57 petang]